

Hello Kampus



PELAJAR Ijazah Sarjana Muda Sains Kesihatan Persekitaran dan Pekerjaan Fakulti Perubatan dan Sains Kesihatan, Universiti Putra Malaysia (UPM), Ahmad Fahmi Yusoff menerima Anugerah Tokoh Siswa 2015 pada majlis yang berlangsung di Dewan Putra 1, UPM baru-baru ini.

Ahmad Fahmi, 23, membawa pulang sebuah Mac Book Air, trofi dan sijil penghargaan.

Beliau ketika ditemui berkata, kejayaan ini merupakan berkat doa ibunya dan rakan-rakan yang tidak pernah putus memberi dorongan.

"Kunci utama dalam diri adalah keikhlasan dan kejujuran. Saya berharap kejayaan ini dapat menjadi inspirasi kepada pelajar lain," katanya.

Selain itu, pelajar Ijazah Sarjana Muda Komunikasi, Fakulti Bahasa Moden dan Komunikasi, Anwarrul Aswad Ahmad, 26, pula memenangi Anugerah Siswa Gemilang.

Anugerah itu telah disampaikan oleh Timbalan Naib Canselor, Hal Ehwal Pelajar dan Alumni, Prof. Datuk Dr. Mohammad Shatar Sabran.

Mohammad Shatar berkata, Anugerah Siswa Gemilang mengiktiraf pelajar UPM yang cemerlang dalam bidang akademik kemahiran insaniah sepanjang bergiat dalam aktiviti kokurikulum.

"Anugerah khusus diberikan kepada pelajar yang telah memperlihatkan ketokohan, kewibawaan, prestasi yang unggul dan kesungguhan yang tinggi dalam aktiviti kokurikulum serta memperoleh keputusan yang cemerlang akademik dan persatuan yang memberi impak tinggi," katanya.

Tambahnya lagi, anugerah berkenaan itu diberikan kepada pelajar tahun akhir yang cemerlang dalam bidang akademik, kokurikulum dan mempunyai ketokohan sebagai pemimpin.

"Kriteria kelayakan pemenang berdasarkan markah merit yang ditentukan oleh jawatankuasa pemilih.

Setiap sumbangan dan pencapaian aktiviti pelajar direkodkan dalam jadual pemarkahan," katanya.

Ahmad Fahmi tokoh siswa UPM

Berjaya membawa pulang sebuah komputer Mac Book Air, trofi dan sijil penghargaan



AHMAD FAHMI YUSOFF (kiri) dan Anwarrul Aswad Ahmad (kanan sekali) menerima Anugerah Tokoh Siswa dan Anugerah Siswa Gemilang daripada Dr. Mohammad Shatar Sabran (dua dari kiri) di Dewan Putra 1, UPM baru-baru ini.

Anugerah tokoh siswa diadili oleh panel berdasarkan dua tugas, perbincangan dalam kumpulan atau *role play* serta ditemu duga.

Sementara itu, Fakulti Pengajian Pendidikan UPM memenangi kategori Anugerah Persatuan Mahasiswa Fakulti Terbaik manakala Kelab Nasyid Nahwan

Nur UPM memenangi kategori Anugerah Persatuan Terbaik dan Kolej Mohamad Rashid pula di nobatkan penerima Anugerah Citra Budaya.